

顏魯公文集

顏魯公文集卷十四

寧鄉黃本驥仲良編訂

湘陰蔣 瓌維揚叅校

外集二

顏魯公行狀

陳郡 殷 亮

公姓顏名真卿字清臣小名羨門子別號應方京兆長安人也顏氏乃春秋小邾子之苗裔昔帝軒轅生昌意昌意生顓帝顓帝生老童老童生吳回吳回生陸終陸終生六子一曰昆吾其國衛也二曰參胡其國韓也三曰彭祖其國徐也四曰會人其國鄭也五曰曹姓其國

邾也六曰季連其國楚也曹姓國於邾春秋邾武公爲
魯之附庸國武公名儀甫字顏公故公羊傳云顏公有
功於齊齊威公命爲小邾子子孫以王父字爲姓氏以
其附庸於魯故代代事魯爲卿大夫故先賢傳孔子弟
子達者七十二人顏氏有其八則顏氏之儒學可知也
若顏無繇字路顏回字子淵顏辛字子柳顏高字子驕
顏祖字襄顏噲字子聲顏之僕字叔井顏何字冉是也
至公之十六代祖魏青徐二州刺史諱盛自魯國居瑯
琊葬臨沂縣西七里十二代祖晉侍中諱含自瑯琊居
丹陽五代祖北齊黃門侍郎諱之推自丹陽居京兆長

安高祖秦王府記室參軍諱思魯曾祖蔣王文學著作
郎諱勤禮祖曹王侍讀諱昭甫父薛王友贈太子少保
諱惟貞卽祕書監師古之曾姪孫也公以家本清貧少
好儒學恭孝自立貧乏紙筆以黃土埽牆習學書字攻
楷書絕妙詞翰超倫

案以黃土埽牆習字據家廟碑乃公父惟貞事公幼孤隨母育於外

祖殷子敬吳縣令署不應乏紙筆之具

年弱冠開元二十二年進士及第

登甲科二十四年吏部擢判入高等授朝散郎祕書省
著作局校書郎天寶元年秋扶風郡太守崔琇舉博學
文詞秀逸元宗御勤政樓策試上第以其年授京兆府
醴泉縣尉黜陟使戶部侍郎王珙以清白名聞授通直

郎長安尉六載遷監察御史制云文學擅於登科器幹彰於適用宜先汧簡之職俾佇埋輪之效尋充河東朔方軍試覆屯交兵使凡閱舉糺士伍舒慘之情事理無不必當七載又充河西隴右軍試覆屯交兵使五原郡有冤獄不決公理之時方久旱而甘澤立應郡人呼爲御史雨八載又充河東朔方軍試覆屯交兵使有滎陽鄭氏兄弟三人或居令長或尉京畿劇任往年母亡殯於太原佛寺空園之內經二十九載未葬公乃劾奏之敕三人放歸田里終身勿齒左金吾將軍李延業素承恩渥曾召蕃客內宴引駕仗不報臺公責之延業憑恃

權勢於朝堂喧憤公奏之出爲濟南太守朝廷憚焉不
敢不肅八月遷殿中侍御使時中丞宋渾以私怨爲御
史吉溫崔珪所誣告謫賀州公謂珪溫曰奈何以一時
之忿而欲危宋璟裔乎由是與二人不平宰相楊國忠
初黨於溫亦怒公之不附已令吉溫諷中丞蔣冽奏公
爲東京畿採訪判官九載十二月轉侍御史百餘日轉
武部員外郎判南曹提綱目鋤苛細武調者多感而懷
之十二載國忠以前事銜之謬稱精擇乃遂出公爲平
原太守其實去之也公至郡訪孝義名節之士皆旌其
門閭或蠲其戶役安陵處士張鎬多才博識隱居公詣

其居與之抗禮因廉使巡察乃薦焉其後鎬官至中書侍郎同平章事安祿山鎮幽州十餘載末年反跡頗著人不敢言公亦陰備之因歲終式修城乃浚濠增堦壞環垣立植木內爲禦敵之計外託勝遊之資及兵興果賴其固而城得全十四載祿山禍謀將發公遣子至范陽啟祿山以今年冬合當入計祿山猜之不許公旣不得離郡乃遣親客前漢中長史蹇昂奏其狀狀留禁中不報十一月祿山反於范陽衆號十五萬長驅自趙定而南趨洛陽散榜諸郡莫敢枝梧祿山乃榜公令以平原博平兵七千人防河以博平太守張獻直爲副公登

時使平原兵參軍李平乘駟奏之平至東京見封常清
云吾得上旨凡四方奏事者使開函而再封之平聽焉
常清遂倚帳操筆寄書於公論國家之事詞意甚切並
附募捕逆賊牒數十封至平原令堅相待公從之使親
表及門客密送於諸郡因此多有而常清乃尋自敗績
焉有敕賜死於陝州竟不接聲平之未至京師也元宗
歎曰河北二十四郡無一人向國乎及聞平至遣中使
五六輩迎之兼敕平奔馬直至寢殿門然後令下奏事
畢元宗大喜顧謂左右曰顏真卿何如人朕兼未曾識
而所爲乃爾祿山之發范陽也時平原郡有靜塞屯平

盧鎮兵三千五百人並已發赴鎮在路未達公悉追迴更追諸縣武舉及獵射人兼召募精勇旬日至萬餘人遣宗子平原郡錄事李擇交統之驍勇之士刁萬歲和琳徐皓馬相如高抗朗分押營伍皆千夫之長樂以義舉腹心無阻而爲其將帥焉聚兵後數十日公大饗將士於子城西門之外辦吏四人舉酒食所約五十萬廩役之流無不飽飫公躬自撫巡舉酒下淚言國家之恩戮力死節無以上報眾皆激憤勇思致命焉時饒陽太守盧全誠與司馬李正舉兵據其城河間司法參軍李奐殺祿山所置長史王忠於濟南月餘日清河義兵復

歸本郡濟南太守李隨下遊奕將訾嗣賢渡河得博平
僞太守馬冀據其郡各有眾數千或至萬人相次於平
原共推公爲盟主公三辭後聽焉諸郡諮稟指揮告敗
尅日數十至信都郡武邑縣尉李銑來投本縣令龐宣
遠拘留銑母公以私錢十萬募人劫迎之故士眾歎感
無不願效者果遂羣意兼斬龐宣遠首而攜迴十二月
祿山陷東京害留守尙書李愷御史中丞盧奕判官鞏
縣尉蔣清等因使以三人之首來徇河北且以脇降諸
郡逆使者授子光至初拽入門子光大呼曰僕射十三
日入東京遠近盡降聞河北諸郡不從故令我告之公

若損我悔有日在遂歷指三首各言其人公識其是恐
搖人心乃謬謂諸將曰我審此三人皆非也遂命腰斬
子光潛令收藏三首誌其處數日稍定取愷奕等首澡
潔仍縛蒲爲身棺斂發哀致祭城外殯之哭三日舉聲
下淚受文武弔慰左右無不出泣涕者自此義合歸者
益多矣斬段子光之日滄州清河縣兵五千攻常山太
原節度使王承業擁兵最近不時出救常山遂陷諸郡
頗有貳者元宗乃以公爲戶部侍郎依前平原太守充
本郡防禦使仍與節度使李光弼計會招討公以景城
長史李暉爲副李銑賈載前侍御史沈震爲判官是月

又詔公爲河北採訪處置使公又以前咸陽尉王延昌

爲判官張澹爲支使時清河郡寄客李華

後因獻封事睿宗有敕改

名爲郡人來乞師於公曰竊聞公高義首唱河朔歸順

之人皆依倚以爲聲氣洪贍人心可用若不倦於聽則

僕請言之公曰何如華曰國家舊制江淮郡租布貯於

清河以備北軍費用爲日久矣相傳爲天下北庫今所

貯者有江東布三百餘萬疋河北租調絹七十餘萬當

郡綵綾十餘萬累年稅錢三十餘萬倉糧三十萬時討

默啜甲仗藏於庫內五十餘萬編戶七十萬見丁十餘

萬計其賁足以三平原之富料其卒足以二平原之彊

若因撫而有之以兩郡爲腹心脣齒其餘乃四支耳安敢有不從者哉彼要僕爲行人以造公之壘僕明見其可同心也取命於屏戟之外惟公圖之公曰所合之衆未曾知戰自死且急安有恤鄰之暇哉雖然諾足下之請則可爲乎華對曰清河遣僕致命於公者蓋欲稟義闕字大賢以濟謀非力不足而借公之師以當強寇也瞻仰高意未有決詞定色與濟清河也安敢言爲哉時華纔年二十餘皆沮云必動衆無成惟公奇之迫於衆情未闕許耳華乃就館操書以達其意意者畧言清河去逆就順以全實之資上公之軍而承公之命時不

納而疑之卽僕迴轅之後清河必有所託系與他人與
公爲西面之難無什日之期耳公及噬臍子公覽而驚
之遂排羣議獨仗其決借兵六千人兵旣出平原次於
竟上華將把公手而歸公曰兵旣行矣可以言吾子之
意否華曰近聞朝廷遣程千里統精兵十萬自太行東
下擬詣嶠口助河北諸軍討滅叛逆而嶠口爲賊所守
千里兵不得東出須先伐魏郡袁知泰泰祿山所署僞太守納舊
太守司馬垂使爲西南主分開嶠口出千里之軍因令
討鄴郡以北直至幽府已來未順城邑平原清河率同
盟諸將以十萬人直指河陽分效兵巡河而悉制其奔

衝之路計王師東討洛邑必不減二十萬河南諸郡義師西向臨之亦不減十萬公當表請堅壁勿戰不旬月而賊有潰敗相圖之勢矣公然之遂移牒清河等諸郡並遣人將宗子李澤交副將平原令范東馥偏裨和琳徐皓等十餘人促兵清河合勢以便宜從事華復命於清河因兵合之際修永濟渠引水遶州城上大修守戰之具旬日而畢又以清河四千兵與平原連蹤而西時博平亦義兵千人來合於是三郡之師屯於博平郡堂邑縣西南十里袁知泰遣其麾下將白嗣深乙舒蒙等率二萬人來拒戰三郡之兵盡日苦鬪遂大敗之斬首

萬餘級生擒一千餘人馬一千匹軍資器械不可勝數

其日魏郡城東南面女牆一百五十步無故而崩

去郡邑百

里戰日而崩所以爲異

知泰走投汲郡於是自魏郡以東至堂邑

百餘里莫不攜壺漿於道側以候官軍公聲益震境內稍安初平原之師旣西合清河時賊將史思明圍饒陽恐平原救之仍遣遊奕兵來拒前鋒去舊縣十里公懼不敵乃遣驍將刁萬歲以三千兵逆之堅壁不戰又以書過河招北海太守賀蘭進明統馬步兵五千來助公陳兵而迎之相揖哭於馬上懷慟三軍宴犒甚厚進明遂屯平原城南息養士馬公每事咨謀之自是兵威之

重稍移於進明矣而公不以爲嫌進明未有所之李擇
交兵丁清河尋又破於堂邑而因公以有功禮遜於進
明加河北招討使擇交東馥徵進官級其清河博平有
功不錄一人時論進明必有後敗末期果失律於信都
城下有詔抵罪公縱之使赴行在進明以全乃公護之
也君子曰竊人之財猶爲之賊況竊人之功乎進明之
不死幸也然公亦過於寬厚矣三月河北節度使李光
弼以朔方馬軍三千步軍五千初出土門將討定河朔
公乃抽兵歸并放博平清河等軍各歸本郡斂戢以待
光弼之命俄而光弼拔平山郡敕改常山爲平山續有詔遣郭